



Radund 1200 persunan han sa participads al til tras la citad da Cuira.

FOTOS LIVIA MAUERHOFER

Ir sin via per daplì colurs

A l'emprim eveniment da «Pride» en il Grischun èn sa participadas questa sonda radund 1200 persunas. Ellas han demonstrà per acceptanza ed egalitad da la cuminanza da LGBTQ+. L'uniun «Khur Pride» ha organisà quella manifestaziun en la chapitala grischuna.

In til tras la citad da Cuira è stà il punct da partenza ed il punct central da l'emprima «Khur Pride». Bleras persunas han purtà las colurs da l'artg Son Martin – per mussar colur a favur da la cuminanza da LGBTQ+ e per prender uschia il pled encunter discriminaziun en dumondas da l'orientaziun e l'identitad sexuala. Da la staziun è la fulla colorada chaminada tras la Poststrasse vers la citad veglia, tras la Obere Gasse enfin en il parc dal Stadtgarten.

Cumbatter pregiudizis

Il messadi da la «Khur Pride» è stà: «Ti es bel e bun uschia sco ti es – i na dependa betg, sche ti es schvul, lesbic, transvestit u nun-binar». La «Pride» è in'occurrènza per festivar la cumunitad da LGBTQ+, sco era per cumbatter per vesaihladad, acceptanza ed identitad da quella. Plinavant duai l'occurrènza era gidar da cumbatter pregiudizis, construir punts e commemorar a tut ils pioniers e tut las pionieras da la cumunitad LGBTQ+.



Era la cussegliera naziunala Tamara Funicello (PS, Berna) ha tegnì in pled en il Stadtgarten.

Festa enfin en la notg

En il Stadtgarten hai dà in program cultural enfin la saira tard: musica, plects, drag-shows e stans per s'infurmar e per mangiar. Suentar las 23.00 èsi i vinavant cun la after-party en il Quadro 22 a Cuira.



In program multifar hai dà sonda suentermezdi en il Stadtgarten a Cuira.

Tenor l'agentura da novitads Keystone-SDA èn sa participadas radund 1200 persunas a la manifestaziun. E la polizia da citad da Cuira ha rapportà che la manifestaziun da sonda saja stada paschaivla e ch'i n'haja dà nagins incaps. (rtr/fmr)